

Dithero tsa Tirelano mo Kutlwanong

37/2015 Thero ka Sontaga wa 5 morago ga moletlo wa Borarobongwe, e le ka 05. 07. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, le kwadilwe mo go Baef. 2:8, le re: **"Gonne lo pholositswe ka boitshwarelo ka tumelo; mme ga go tswe mo go lona, ke neo ya Modimo."**

1. Sefela sa 269 - 251/260

2. Thapelo: Modimo, Rara wa rona yo o mo legodimong, re a loboga, ka o sa re latlhe, rona baleofi, mme o re rometse Mopholosi yo e leng Morwao gore a re batle, a re senke, a re pholose, a re busetse mo go wena yo o leng Motswedi wa botshelo. O re fe Mowa o o Boitshepo wa gago gore re tthaloganye lefoko la bopelotlhomogi jwa gago, re dumele mo go Jesu Keresete Mopholosi wa rona, re mo ikanye, re mo sale morago. Re rapela jalo mo leineng la gagwe. Amen.

3. Lefokoo la Testamente e kgologolo le kwadilwe mo go Gen. 12:1-4a;

Epistolo ka fa thulaganyong ya 2 e kwadilwe mo go 1 Bakorinthe 1:18-25;

Efangele ka fa thulaganyong ya 3 e kwadilwe mo go Johane 1:35-42.

4. A go ipolelwe tumelo ya bokeresete!

5. Sefela sa 252 - 234/243

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Luka 5:1-11, e re: "E rile Jesu a eme fa letsheng la Genesareta, batho ba mo pitlaganya go utlwa Lefoko la Modimo; a bona mekoro e mebedi e eme fa letsheng; batshwari ba ditlhapi ba bo ba dule mo go yona, ba tlhatswa matloa. A palama o mongwe wa mekoro, e le wa ga Simone, a ba a mo kopa gore a o katose lefatshe go le gonnye, a nna fa fatshe, a ruta batho a le mo mokorong. Ya re a sena go khutla go bua, a raya Simone a re: 'O suteletse kwa go

boteng, lo lathele matloa a lona gore lo tshware.' Simone a fetola a re: 'Moruti, re letse re itapisite bosigo jotlhe, ga re a ka ra tshwara sepe. Le fa go ntse jalo, ke tla lathele matloa ka lefoko la gago." Ya re ba dira jalo, ba sobokanya bontsi jo bogolo jwa ditlhapi, matloa a bone a ba a thanyega. Ba gwetlha balekane ba bone ba ba mo mokorong o mongwe gore ba tle go ba thusa. Ba tla, mme ba tlatsa mekoro e mebedi eo, mo e bileng ya batla go teba. Ya re Simone Petoro a bona, a wela fa mangoleng a ga Jesu a re: 'Morena ntlogele, ka gonne ke monna yo o boleo.' A re jalo, gonne letshogo le kgakgamalo di ne di mo wetse, le botlhe ba ba nang nae, ka ntlha ya tshwaro ya ditlhapi e ba e bonyeng; fela jalo di tshwara le boJakobo le Johane, bomorwa Sebeteo, ba e leng balekane ba ga Simone. Jesu a raya Simone a re: 'O se ka wa boifa; go simolola kajeno o tla nna motshwari wa batho.' Ya re ba sena go fitlhisana mekoro kwa lesing, ba tlogela tsotlhe, ba mo sala morago." Amen.

8. Thero: Barategi mo Moreneng Jesu Keresete, ke le legolo lefoko la ga Jesu Keresete, lona le le reng: "O se ka wa boifa!" Modimo o re bolelela lefoko leo, rona ba re leng batho ba re leng baleofi, ba re sa tshwanelweng ke go atamela mo go ene ka ntlha ya tshiamololo ya rona, le e seng go pholosiwa ke ene, le e seng go nna bana ba gagwe. "O se ka wa boifa!" Lefoko leo ke le lentle, ke kgomotso e kgolo mo go rona ba re leng baleofi. Le akaretsa Efangele yotlhe ya ga Jesu Keresete. Fa re buisa Efangele ka fa Luka a e kwadilweng ka teng, le Ditiro tsa baapostolo, re tla bona gantsi gore o kwadile lefoko le la gore **re se boife**. Moengele a le bolelela badisa bosigong jole, a re: "**Se boifeng**; gonne bonang, ke lo tsiseditse mafoko a a molemo a boitumelo jo bogolo jo e tla nnang jwa batho botlhe; ka gonne gompiano lo tsaletswe Mogolodi mo motseng wa ga Dafita, yo e leng Keresete Morena," Luka 2:10-11. Re le utlwa ka molomo wa moengele yo o buileng, a re: "Sagaria, **o se ka wa boifa**; gonne thapelo ya gago e utlwilwe. Elisabete, mosadi wa gago, o tla go belegela ngwana wa mosimane, mme o bitse leina la gagwe Johane," Luka 1:13. Le mo go Maria moengele a re: "Maria, **o se ka wa boifa**, gonne o bonye bopelotlhomogi mo Modimong," Luka 1:30. Jesu a raya Jairo ya re a sena go tlhokofalelwa ke morwadie, a re: "**Se boife**; dumela fela, mme ngwana o tla tshedisiwa," Luka 8:50. Morena Jesu Keresete e bile a raya Paulo bosigo ka pono, a re: "**O se ka wa boifa**; bua fela, o se ka wa didimala! Gonne nna ke na nao, mme ga go ope yo o tla go thaselang go go direla bosula; gonne ke na le batho ba bantsi mo motseng o." Dit. 18:9-10. Le mo mokorong Paulo o ne a utlwa lefoko le le reng: "Paulo, **se boife!** O tshwanetse go ema fa pele ga

Kaisara; mme itse gore Modimo o tla pholosa botlhe ka ntlha ya gago ba ba etang nao mo mokorong," Dit:27:24. A re se ka ra lebala gore Modimo o tlhodile ka lefoko la ona. Lefoko la ona ke thata go dira tse o di bolelang. Ke ona o o re abelang mo pelong gore **re se boife**. Ke ona o o re nonofisang gore re nne le bopelokgale, **re se boife** boleo, Satane, le e seng loso, gonne o di re fenyeditse tsotlhe tseo ka go re romela Jesu Morwaaona mo lefatsheng. Jesu Keresete ke ene Mofenyi wa dira tsa rona.

Ka lefoko la Efangele ya thero ya kajeno re bontshiwa Morwa Modimo a ntse a tsamaya mo lefatsheng, a ruta batho, a ba rerela Efangele ya puso ya Modimo, a dira tsotlhe tseo a ntse a le mo kemong ya gagwe ya go nna Motlhanka. Fa re buisa ditemana mo bofelong jwa kgaoalo ya 4 re a utlwa gore Jesu o ne a kgalemela medemone gore a se ka a bua, le fa e ne e itse gore ke ene Keresete, Morwa Modimo, mme batho ba ne ba sa mmone jaaka medemone e mmoneye, ba amogetse Jesu ba re o tshwana le batho ba bangwe. Ba bua, ba tsamaya le ene ba mo amogela jaaka motho yo o neng a tshwana le bone, mme tota-tota e le Modimo ruri, e le Modimo yo o amogetseng botho le kemo ya motlhanka. Ke se se re senolelang bopelotlhomogi jo bogolo go setho sotlhe.

Mo lefokong la thero ya kajeno ga re utlwe tse dintsi tsa a di rutileng, mme Luka o re bolelela sentle gore "e rile Jesu a eme fa letsheng la Genesareta, batho ba mo pitlaganya **go utlwa Lefoko la Modimo**; a bona mekoro e mebedi e eme fa letsheng; batshwari ba ditlhapi ba bo ba dule mo go yona, ba tlhatswa matloa. A palama o mongwe wa mekoro, e le wa ga Simone, a ba a mo kopa gore a o katose lefatshe go le gonnye, a nna fa fatshe, **a ruta batho a le mo mokorong," a ba ruta Efangele ya Modimo**. Gape re utlwa, fa a bolelela mongwe wa batshwari ba ditlhapi, e bong Simone, a re: "O suteletse kwa go boteng, lo latlhele matloa a lona gore lo tshware." O ka re Simone o ne a sa lemoge gore ke mang tota yo o neng a mmolelela gore o tshwanetse go tshwara ditlhapi jang, a re: Jesu o nonofile go ruta lefoko la Modimo sentle, mme a sa tlhaloganye sentle go tshwara ditlhapi, ke gona a fetolang a re: "Moruti, re letse re itapisite bosigo jotlhe, ga re a ka ra tshwara sepe. Le fa go ntse jalo, ke tla latlhela matloa ka lefoko la gago." Ke re Simone Petoro o ne a ise a lemoge gore Jesu ke mang, gore a kgone go mo ruta ka fa go tshwarwang ditlhapi ka teng. O ne a ise a bone gore Jesu ke Mong-wa-thata-tsotlhe, Morwa Modimo. A sa bone gore ke Motlhodi wa ditlhapi tsotlhe yo o neng a bua jalo le ene. O ne a sa itse gore tota-tota e ne e le mang yo o neng a nna le ene mo mokorong wa gagwe. Mme rona re

setse re senoletswe gore re itse gore fa Jesu bua sengwe, se tla diragala. Fa a re ba tla tshwara, re a itse gore ba tla tshwara. Jesu ke Mong-thata-yotlhe, mme o ne a ikokobetsa mo go kalo, a fitlha boModimo jwa gagwe, a nna nama, a nna motho jaaka rona, mme a se na boleo bope. Tse di diragetse gore a kgone go dirafatsa tiro ya gagwe ya go baakanyetsa batho botlhe pholoso le botshelo jo bo sa khutleng.

Re itse tse di kwadilweng mo go Ekes. 33:20 gore "O tla palelwa ke go bona sefatlhego sa me; gonne motho ga a ka ke ya re a mponye a tshela." Modimo a bolelela Moše tseo. Mo sebakeng seno sa lefatshe ga go na motho yo o nonofileng go bona Modimo mo kgalalelong ya ona, gonne motho ga a ka ke ya re a o bona a tshela. Boitshepo jwa ona ga bo tsalane le boleo, le e seng le moleofi. Lesedi ga le tsalane le lefifi. Mme Jesu o a ikokobetsa, a fitlha boModimo jwa gagwe ka nama ya botho gore re kone go tsalana le go kopana le ene gore a kgone go dirafatsa tiro ya gagwe ya go re pholosa. Modimo ke o, Jesu Keresete ke yo, e le yo o tsamayang fa gare ga batho, mme ga ba nyelele, ke ka ntlha ya boikokobetso jwa gagwe.

Simone o ne a tshwara ditlhapi tse dintsi. Ka kgakgamatso eo o ne a senolelwa se Jesu e leng sona.

Ya re Simone Petoro a bona, a wela fa mangoleng a ga Jesu a re: "Morena ntlogele, ka gonne ke monna yo o boleo." Barategi mo Moreneng, go ntse jalo, fa moleofi a kopana le Mong-wa-thata-yotlhe, o e leng o o Boitshepo, le Modimo. Le rona re a obamela mo tshimologong ya tirelo-Modimo, re khubama ka mangwele, re kopa teng go atamela mo Moreneng wa rona mo tirelong ya gagwe, re re: "Nkutiwele botlhoko, nna yo ke leng moleofi." Ke kotsi e kgolo mo mothong go bonana le Modimo. Ka fa tshwanelong re tshwanetse go swa. "Morena ntlogele, ka gonne ke monna yo o boleo." Ntlogele, gonne ke rata go tshela, ga ke rate go swa. Ke ka go bona jang ka matlho a me, ke tshele? Koo Jesu o re bolelela le rona lefoko le lentle le le reng: **O se ka wa boifa.** Jesu Keresete ga a tle mo lefatsheng go nna le rona gore a re bolaye. A tla gore a re pholose. **O se boife,** o a re pholosa, o a re direla, o re golola mo direng tsothe tsa rona tse e leng boleo, loso, le Satane. Jesu Keresete ga a a tla gore a re bolaye. Efangele ya gagwe e e leng molaetsa o o itumedisang, e tlosa poifo mo go rona ba re leng barutwa ba gagwe. A re: **O se boife,** ga ke rate loso lwa gago, ke a rata gore o tshele, o phologe, o nne le nna mo pusong ya legodimo go ya bosakhutleng.

Simone a bona Jesu Keresete, a bona Modimo, mme o ne a tshela gonne Jesu o gorogile mo lefatsheng ka kemo ya Motlhanka gore a re direle, a re golole, a re pholose. Jesu Keresete a ineela go nna mogoloe wa rona, a re direla ka botshelo jwa gagwe, le ka loso le tsogo ya gagwe mo baswing. Re bana ba ga Rraagwe, yo e leng Rara wa rona ka ene Jesu, a re rekolola ka madi a gagwe, ka ene re bana ba Modimo. Ga re makgoba a ona, le e seng badiredi ba boleo, le e seng ba ga Satane, le e seng ba loso, mme re bana ba Modimo. Jesu Keresete o ne a bitsa Simone gore a mo sale morago, a mo direle, e nne motshwari wa batho. Simone a sala Jesu morago go ya mo lelapeng la moperesiti yo mogolo. Ka bosigo joo a latola Jesu gararo. Jesu a mo leba, mokoko a lla, Peto a gopola mafoko a Morena wa gagwe, ke fa a ne a lela mo go maswe, mme Jesu a mmusetsa gape, a mo tsenya gape mo tirong, a mmotsa gararo, a re: "Simone, morwa Jona, a o nthata?" Jesu o ne a dirisa Peto gore e nne motshwari wa batho, a rere Efangele ya puso ya Modimo jaaka Morena wa gagwe. Re ithuta ka tseo mo Ditirong tsa baapostolo. Teng koo o ne a bona tlabologo le kolobetso ya ba le bantsi ka go ba rerela le go ba laletsa go ineela go kolobediwa.

A re boneng sentle bopelothomogi le bopelotelele jwa Modimo mo Efangeleng ya kajeno. Re lemoge gore re lekolwa ke Modimo ka kemo ya motlhanka e ntse e le Morwaaona gore Morwawe a re golole mo bosuleng jotlhe ka madi a gagwe. A re lemogeng gore o tla go re batla, go re bitsa, le go re tsenya mo tirong. Ka lorato lo logolo thata o a re goga ka go atamela mo go rona ka lefoko gore re atamele mo go ene ka tumelo. A re ithuteng go mo sala morago, re ithute mmogo le Simone go tshwara batho kwa re agileng teng gore le bone ba pholosiwe, le bone ba tsene mo pusong ya Modimo. A re boleleleng batho ka ga lorato lwa Modimo, re ba bolelele ka ga bopelothomogi le bopelotelele jwa ona. Mopholosi wa rona o molemo thata, o re raya rona ba re leng baleofi, a re: **"Lo se ka lwa boifa!"** ke lo swetse, ke lo tsogetse, ke lo baakanyeditse manno a mantle mo kgalalelong ya me. Amen.

9. Thapelo: Modimo, Rara wa rona yo o mo legodimong, re lebogela Efangele ya ga Morwao Jesu Keresete, gonne ga o rate go swa ga rona, mme o rata gore re tshele. Boloka tumelo ya rona gore re nne batshwari ba ba siameng mo pusong ya gago, re tshware ba bangwe gore ba tshele mmogo le rona mo pusong ya gago, re nne le bopelokgale mo tirong ya gago gore re se lape, mme re e tloafalele sentle jaaka badiredi ba ba ikanyegileng. Re bolelele batho lorato lwa gago lo re lo senoletsweng ka

Jesu Keresete, Mopoholosi wa batho botlhe. Re kopa jalo mo leineng la gagwe le le boitshepo. Amen.

Thapelo ya Morena: Rara wa rona yo o mo legodimong ...

10. Sefela sa 263 - 245/255

kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke P. C. Weber , ka ngwaga wa 2015.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage